

人兩跂，錢四跂

我聽過一 e5 故事-----

有一 e5 散赤人，去到廟裡向神祈禱：

「神啊，我箍絡做足久矣，我無想欲閣做箍絡矣！請你賜我一片仔土地，予我有為家己的稽頭做工課的機會！」

神聽著了，感覺這 e5 散赤人確實可憐，就同情伊講：

「會用得！毋知我愛賜你佻濟土地，你才有夠用？」

神答應矣！散赤人有夠意外的歡喜，伊頭搖搖幌幌咧，停一睏仔才講：

「若準會使，當然愈濟愈好。」

神真阿沙力講：

「無問題！干焦一 e5 要求，你會當得佻濟土地，愛看你的能力。對明仔早仔日頭出來算起，一直到日頭落山為止，只要你經過的所在，土地攏是你的。但是，請會記得，日頭落山以前，你愛轉來到遮，才有準算！」

這一暝，散赤人早早著去睏矣。不而過，愈想欲睏，愈拍拚睏，煞愈睏袂去，踎棉床頂，翻過來閣翻過去。

好不容易，日頭出來矣。散赤人起跂往東一直走。無佻久，散赤人著走離開庄頭，經過一片平洋、一座樹林、一條溪流了，伊發現：

「日頭佇九點的位置，才半晡爾，遮的土地離做好額人，猶差誠濟咧！」

走啊，走啊，日頭來到正中央矣。散赤人衫仔褲早著澹漉漉，氣力嘛強欲盡磅矣。毋過，伊猶無翻頭的意思。伊心內想：

「猶無夠咧！欲做大好額人，猶差遠咧！」

走啊，走啊，日頭來到下晡三點的位置矣。散赤人嘛已經有汗流甲無汗，有氣力走甲無氣力矣。伊提醒家己：

「日頭落山以前，愛走轉去到廟呢。」

散赤人雄雄越轉身，下晡三點的日光像千萬支箭射落來，伊目 tsiul 撥攏袂金，頭一陣楞一陣眩，身軀蹣咧蹣咧，雙跂接載袂勞，就按呢仆落塗跂昏昏死死去矣。

這 e5 散赤人變做大好額人的夢，嘛變成是永遠無可能實現的夢。

台諺講，人兩跂，錢四跂。是啊，人無限的慾望，予人感覺錢當時嘛不足，錢當時嘛像生有四枝跂，曷人干焦有兩枝跂，當然人較按怎逐錢嘛逐袂著、袂滿足。